


**Ki Sawa Bad
Ki Dur Kyntien
Jong
Ka Ktien Khasi**



**Da
Ka Badaplin War**

2009

Ki Sawa Bad
Ki Dur Kyntien
Jong
Ka Ktien Khasi

Da
Ka Badaplin War

2009

Ka sien shon kaba nyngkong - 2001

1000 Copies

Ka sien shon kaba ar - 2004

2000 Copies

Ka sien shon kaba lai, ba la pynbha bad pynheh - 2009
(Third reprint revised and enlarged)

2000 copies

Īa ka hok longtraï la tyngkai
(All rights reserved)

Published by Ri-ia-dor at *Rilum Offset Printing House*,
Umsohsun, Shillong, Meghalaya.

KA SIEN SHON KABA LAI

Ha ka sien shon kaba lai jong kane ka kot la pynrung thymmai kawei ka lynnong kaba long halor ki dak-thoh bad ka rukom spel dak da kaba pyrkhath ba kane kan ai jingmut kumno ban pynbeit ryntih ĩa ka thoh ka pule ha ka ktien Khasi, ki jingeh kiba dang sah katto katne ha ka.

La pynheh bad pynbha ruh ĩa ki lynnong ba la pynrung ha ki sien shon ba la dep da kaba pynbeit pynryntih ĩa ki senten. Shuh shuh la pyrshang ban tyrwa da ki kyntien Khasi bad la spel Khasi ruh ĩa ki katto katne ki symboh pyrkhath bad ki kyrteng-batai (terms) ha kane ka kot. Hynrei da kaba angnud ban pyllait na kano kano ka jingsngewthuh bakla, la ai de ryngkat bad ki ĩa ki kyntien English. Lehse ynda la thew la woh, la pynbiang pyrļa bad ynda la lah ban pynbat pynsnoh bha ĩa ki, yn sa lah ban pynrung noh tang da ki kyntien Khasi ha ki sien shon kiba hadien. ĩa mynta hi, la bteng ban pynrung da ki kyntien English na ka bynta ki katto katne tylli ki kyntien kum **phoneme**, **morpheme**, **deictic**, **clitic**, **verb**, **noun** bad kumta ter ter.

Ñiuma la pyrshang katba lah ban ai ka jingbatai kaba kham suk ha ka ktien Khasi na ka bynta jong ki. La batai ĩa u **phoneme** kum u phngit sawa, ĩa u **morpheme** da ka snap kyntien, ĩa ka **compounding** da ka syndait kyntien bad ki **compound** da ki kyntien syndait, ĩa ka **reduplication** da ka synrap kyntien bad ki **reduplicated words** da ki kyntien synrap.

La phiah ĩa kane ka kot ha ki lai tylli ki bynta – ka bynta ba nyngkong ka kynthup lai tylli ki lynnong kiba tai kyllum halor katto katne ki mat jong ka ktien Khasi, ka bynta kaba

ar ka kynthup san tylli ki lynnong kiba tai bniah halor ki sawa (phonetics and phonology), ka bynta kaba lai ka don hynñiew tylli ki lynnong kiba batai shaphang ki kyntien (morphology).

La pynbit pynbiang ïa kane ka kot na ka bynta ki samla pule B.A. kiba pyndonkam ïa ka **syllabus** thymmai (revised syllabus 2009) hynrei ki samla pule kiba dang hab hapoh ka **syllabus** kaba rim kin ïaid lait noh ïa ki Lynnong III, IV, V, VI, VII bad VIII.

Nga kyrmen ba kane ka kot kan ïai bteng ban shakri na ka bynta ka jingdonkam ban tai ban pharia ïa ki katto katne ki snap ki skor, ki thup ki syrtap jong ka ktien Khasi.

Dated Shillong

Badaplin War

August 31, 2009.

(iv)

KA SIEN SHON KABA AR

Dr. Badaplin War

M.A. (English) NEHU, M.A. (Linguistics) University of Delhi,

Mphil (Linguistic) University of Delhi

PhD (Linguistics) University of London, UK.

Professor and Head, Department of Khasi, NEHU.

Ha kaba nyngkong eh, nga pynpaw ïa ka jingsngewnguh jong nga ïa ki nongpule baroh kiba la pule ïa kane ka kot. Ka jinglut kloijong kane ka kot lehse ka pyni ïa ka jingñiewkor jong ki ïa la ka ktien namar ba ka jingtip kaba bniah halor ka ktien ka long kaba donkam na ka bynta kano kano ka kynhun jaitbynriew. Kumba la ju ïa kren ha kiba bun ki khep, kawei na ki lad kiba khlaif eh ha ka ban pynneh pynsah ïa ka jinglong kyrpang jong ka jaitbynriew ka long lyngba ka jingñiewkor ïa la ka ktien (maintenance of culture through language). Nga sngew tynnat shibun eh ba la don ruh ki 'riew-wad jingtip (research scholars) kiba la sdang ïa ki jingtrei (research) jong ki halor ki katto katne ki phang ba la plaid ha kane ka kot. Kata hi ka long kawei na ki jingthmu ha kaba la thoh bad pynmih ïa ka, ban ktik ïa kiwei pat ban suh-khlieh kham jylliew sha ki par-hira jong ka Ktien Khasi.

Ha kane ka sien-shon, la ïaleh ban pynbeit ïa ki katto katne ki jingbakla kiba don ha ka sien-shon kaba nyngkong hynrei ym shym la pynrung eiei kaba thymmai. Lada U Blei U ibit, nga dang pynkhreh bad nga kyrmen ba ngan lah ban pynmih ïa ki kot ki ban tai ïa kiwei de ki bynta jong ka Ktien Khasi.

Nga pynpaw ruh ïa ka jingsngewnguh jong nga ïa i Walter Thabah, M.Phil Scholar jong ka Khasi Department NEHU iba la ai jingmut ban khot 'syndait kyntien' na ka bynta ka kyntien **compounding** bad 'synrap kyntien' na ka bynta ka kyntien **reduplication** ha kane ka sienshon kaba ar.

U Blei Un kyrkhu ïa phi ki nongpule baroh.

Dated Shillong

(B. War)

The 27th September, 2003

(v)

KI SKER

	Page
Ka Lamkhmat	iii - vii
BYNTA – I <u>Kyllum Halor Ka Jingpule ĩa Ka Ktien Khasi</u>	
<i>Lynnong I</i> - Halor Ka Jingpule ĩa Ka Ktien	1
<i>Lynnong II</i> - Ka Jaka jong Ka Ktien Khasi	6
<i>Lynnong III</i> - Ki Dak-thoh Ha Ka Ktien Khasi	18
BYNTA – II <u>Halor Ka Phonetics Bad Ka Phonology</u>	
<i>Lynnong IV</i> - Ka Jingpule ĩa Ka Phonetics	31
<i>Lynnong V</i> - Ka jingpule ĩa Ka Phonology	45
<i>Lynnong VI</i> - Ki Sawa Konsonan Ha Ka Ktien Khasi	50
<i>Lynnong VII</i> - Ki Sawa Bowel Ha Ka Ktien Khasi	63
<i>Lynnong VIII</i> - Ki Dak Phonetic Bad Ka Assimilation Ha Ka Ktien Khasi	70
BYNTA – III <u>Halor Ka Morphology Bad Ki Lad Shna Dur Kyntien</u>	
<i>Lynnong IX</i> - Ka Morphology Bad Ki Snap Kyntien Affix	74
<i>Lynnong X</i> - Ki Snap Kyntien Clitic	95
<i>Lynnong XI</i> - Ki Kyntien Syndait (Compounds)	99
<i>Lynnong XII</i> - Ki Kyntien Synrap (Reduplicated words)	110
<i>Lynnong XIII</i> - Ki Kyntien Shim Kylliang (Loan words)	116
<i>Lynnong XIV</i> - Ki Kyntien Ba La Saiñ Thymmai (Coined words)	133
<i>Lynnong XV</i> - Ki 'Tien-Kynnoh.	135
Ka Par Jingtip	140

BYNTA - III

HALOR KA MORPHOLOGY BAD KI LAD SHNA DUR KYNTIEN

LYNNONG - IX

KA MORPHOLOGY BAD KI SNAP KYNTIEN AFFIX

Baroh ki jait ktien ha ka pyrthei ki don la ki jong ki snap kyntien ryngkat bad ki lad ki lynti kumno ban shna dur ïa ki. Nalor ki sawa, ka jingpule ïa ka ktien ka dawa ruh ïa ka jingitbniah halor ki kyntien bad ki dur jong ki. Kaba kum kane ka jingpule ka hab ha ka tnat-pule **morphology**. Ka kyntien **morphology** ka wan na ka kyntien **formenlehre** jong ka ktien German kaba mut ka jingpule ïa ki dur jinglong (a study of forms). La pyndonkam nyngkong eh ïa kane ka kyntien ha ka lyngkha pule **biology**. Hynrei mynta ka tnat-pule **morphology** ka la rung bad suhthied bha ha ka jingpule ïa ka ktien.

Ka **morphology** ka dei ka tnat jong ka **linguistics** kaba pule bad bishar bniah halor ka dur ka dar jong ki kyntien bad halor ki lad ki lynti kumno ban shna dur ïa ki. ïa kane ka tnat-pule la ju pynshong nongrim halor ki snap kyntien ba la khot ki **morpheme**.

Ki **morpheme** ki dei ki snap kyntien lane ki bynta ba rit tam jong ka kyntien bad kiba kit jingmut. Kata ka mut ba ka jingdon ne ka jingbymdon jong kine ki snap kyntien ka pynkylla ïa ka jingmut jong ka kyntien baroh kawei.


Ki snap kyntien **morpheme** kiba lah ban ïeng da lade ha ka senten bad ki bym donkam ban pyndait lang bad kiwei pat la khot da ki snap kyntien ba laitluid (free morpheme) kum 'leit', 'shong', 'khla', 'briew'.

Ki snap kyntien **morpheme** ki bym lah ban ïeng hi da lade hynrei kiba hap ban pyndait lane pynsnoh bad kiwei la khot da ki snap

kyntien ba shah teh (bound morpheme). Kum ka nuksa, ka kyntien 'pyntip' ka don ar tylli ki snap kyntien, u **morpheme** 'tip' uba laitluid bad u **morpheme** 'pyn-' uba shah teh. Ym kum u **morpheme** 'tip' uba lah ban ieng hi da lade, u **morpheme** 'pyn-' um lah ban ieng hi da lade bad u hap ban shaniah ne snoh ha kiwei pat. Une u dei u **morpheme** ne snap kyntien ba shah teh.

Ki **morpheme** ki long kum ki mawkynroh kiba siang nongrim ia ki jingtei kiba kham halor ha ka ktien, kata ia ki kyntien, ki phreis (phrase) bad ki senten.

Ka dur (flow chart) harum ka pyni kumno la phiah ia kitei ar tylli ki jait **morpheme**:



Dur 16

Hangne ngin sdang da ka jingbatai halor ki snap kyntien ba laitluid kumba la pyni ha katei ka dur haneng. Kata kaba mut ba yn batai shuwa ia ki snap kyntien ba kit jingmut (lexical free morpheme) bad hadien kata yn sa ai ia ka jingbatai halor ki snap kyntien kiba pyndep ia ki kamram **grammar**. Hadien kata, yn sa ai sa ka jingbatai halor ki snap kyntien kiba shah teh bad hangta ruh yn tai shuwa halor ki **inflectional bound morpheme** bad khatduh eh halor ki **derivational bound morpheme**.

Ki snap kyntien ba laitluid (free morpheme):

Kiba bun ki kyntien ha ka ktien Khasi ki hab ha ka thup ki snap kyntien ba laitluid. Kumba la pyni ha ka dur haneng, la phiah ia ki ha ki ar tylli ki thup:

(1) Ki snap kyntien ba kit jingmut (lexical free morphemes): Kine ki snap kyntien ki kit ia ka jingmut jong ka senten bad kiba iohsngew ia u nongkren ki sngewthuh u ong aiu. Kine ki lah ban long ki **noun** kum 'briew', 'kper', 'ing', 'tympew', 'fyndang'. Ki lah ruh ban long ki **verb** kum 'leit', 'wan', 'trei'. Kiba bun na ki kyntien thymmai kiba la rung ha ka ktien Khasi ki hab ha kane ka thup.

(2) Ki snap kyntien kiba pynbiang ia ka jingdawa ka grammar (functional free morphemes): Kine ki snap kyntien ki pynbit pynbiang ia ka jingdawa jong ka **grammar** bad ki pynbeit ryntih ia ka jaka jong ki **morpheme** ba kit jingmut ha ka senten. Ki nuksa jong kine ki dei ki **conjunction** 'bad', 'hynrei'; ki **preposition** 'na', 'sha', 'ha' nalar kiwei de. Ka kamram ba kongsan jong ki kam dei eh ban ai ia ka khubor jong u nongkren hynrei ban tehsong ia ka shynrong jong ka senten. Kine ki jait **morpheme** kim da bun ha ka ktien bad kham fiar ba kum kine kin rung thymmai ha ka. Pynban wat la ki kham khyndiat, ki dei kine kiba hap ban pyndonkam kham bunsien haba shna ia ki senten ba pher.

Ki snap kyntien ba shah teh (bound morpheme):

Hangne pat ngin bishar halor ki **morpheme** ba shah teh kiba don ha ka ktien. La kdew khyndiat haneng ba kine ki dei ki jait **morpheme** ki bym lah ban ieng hi da lade hynrei kiba hap ban snoh ha kiwei. La ju khot kyllum ia kine ki snap kyntien da ki **affix**. Don lai jait ki **affix** kiba ia pher kat kum ka jaka ba ki shong ha ka kyntien. Kita lai ki long u **prefix**, u **infix** bad u **suffix**.

Ki **prefix** ki dei ki snap kyntien ba shah teh kiba ju pyndait ha khmat jong uwei pat u **morpheme**. Ki nuksa jong u **prefix** ki long:

'pyn-' ha ka kyntien 'pynlong', 'nong-' ha ka kyntien 'nongtuh', 'jing-' ha ka kyntien 'jingsuk'. La ju pynpaw ia u **prefix** da u **dash** uba bud nadien jong u, kata ban kdew ba ka kyntien kyrshan ka don hadien jong u.

Ki **infix** ki dei ki snap kyntien ba la tynsat hapdeng jong ka kyntien, kum ka snap kyntien '-n-' ha ka kyntien 'sad' ban pynlong ia ka kyntien 'snad'. La buh ia u **dash** ha shuwa bad hadien jong ki **infix** ban pyni ba ki ieng hapdeng jong ka kyntien.

Ki **suffix** ki dei ki snap kyntien kiba bud nadien jong ka kyntien kyrshan, kum ka snap kyntien '-to' ha ka kyntien 'shato'. La buh **dash** ha shuwa jong ki **suffix** ban pyni ba ki bud nadien jong ka kyntien kyrshan.

Yn sa ai ka jingbatai kaba kham bniah halor ki **prefix**, ki **infix**, bad ki **suffix** jong ka ktien Khasi ha ki bynta ba kham shadien jong kane ka lynnong.

Hangne yn peit shuwa ia ki bynta ba donkam jong kane ka tnat-pule ha kaba iadei bad ki **affix**. Kine ki long ka **derivational morphology** bad ka **inflectional morphology**.

Ka inflectional morphology:

Naduh ka jingpule pateng ia ka ktien ha ki por mynshuwa, la ju pynndonkam ia ka kyntien **inflectional** tang ha kaba iadei bad ki jait ktien kiba don ka rukom shna dur kyntien kaba kham kyllaiñ, kumba la maitphang lyngkot ha ka Lynnong II. Ha kine ki jait ktien ki don ki snap kyntien ba shah teh kiba ka kamram jong ki ka long ban pynshai halor ki bynta jong kano kano ka klas kyntien ha ka senten. La ju ong ba ka ktien Latin ka dei ka jait ktien kaba don kine ki snap kyntien kiba pynlong ia ka, ka jait ktien kaba kyllaiñ (inflectional language). La kdew sha khmat kumno kine ki pynkylla dur ia ki kyntien, khamtam ia ki **verb** bad ki **noun** na ka bynta katto katne ki kamram **grammar**. Bunsien hi, namarkata, ka **inflection** ka mut

ka jingdon ki **affix** kiba pynkylla **plural** ia ka **noun** lane kiba pynkylla **past tense** ia ka **verb** bad kumta ter ter. To ngin ia peit mynta ia ka **noun** kaba kylla **plural** ha ka English da kaba buh ia u **suffix** '-s'.

Singular

Cat 'ka miaw'

Lip 'ka rmiang shyntur'

Bag 'ka pla'

Plural

Cats 'ki miaw'

Lips 'ki rmiang shyntur'

Bags 'ki pla'

Ha kitei ki nuksa haneng, ngi iohi ba ka jingdon ki **suffix** kiba kdew ia ka jinglong shibun jong ka **noun** ki pynkylla dur ruh ia ka. Ha kine ki jait ktien, la pynkylla dur ia ka **noun** na ka bynta ban kdew ruh ia ka **case** jong ka, kata haba ka trei kam kum ka **subject** (nominative) ne kum ka **object** (accusative) kumba la pyni nuksa na ka ktien Latin ha ka Lynnong II.

Ka ktien English kam don **inflection** ha ka **noun** na ka bynta ban kdew ia ka **case**. Ka **case** ha ka ktien English ka paw tang ha ki **personal pronoun**. Kine ki nuksa harum ki pyni kumno ka **pronoun** ka kylla dur kat kum ka kamram ba ka dei ban pyndep, kata ban kdew ia ka **case** jong ka **pronoun** la ka dei ha ka nongleh (nominative), nongshahleh (accusative) ne ka jinglong trai (possessive):

He (Nominative) kaba mut 'u' kum ha ka senten – He went to school

Him (Accusative) kaba mut 'ia u' kum ha ka senten – Mary saw him

His (Possessive) kaba mut 'jong u' kum ha ka senten – That is his car.

Ngi iohi shai kdar ba ka **pronoun** 'he' kum ka **subject** ka kylla dur sha ka 'him' kum ka **object** bad sha ka 'his' kum ka **possessive pronoun**. Ka pher shisha na ka **pronoun** 'u' ha ka ktien Khasi ka bym don kano kano ka jingkylla dur la ka trei kam kum ka **subject** ne ka **object**. Ha ka ktien Khasi ia kine ki kamram hap ban kdew da ki **preposition** 'ia', 'sha' kiba long ki snap kyntien ba laitluid.

Ha ka ktien Latin, bunsien ki **verb** ki kylla dur ban kdew ia ki kamram **grammar** kum ka **mood**, ka **aspect** bad ka **tense**. Niuma ka ktien English kam da kyllaiñ eh kum ka ktien Latin hynrei ka don hi ka **inflection** ha ka **verb**. Ngi iohi ia kane haba la pynbud da u **suffix** '- ed' ia ka **verb** ban kdew ia ka por ba la dep (past tense).

Present Tense

Walk
Laugh
Smile
Cry

Past Tense

Walked
Laughed
Smiled
Cried

Kumta na ka liang ka **morphology**, ngi iohi ia ka **inflection** ha ka ktien Latin bad katto katne ha ka ktien English.

Ha ki nuksa ba la ai haneng na ka ktien English, ngi iohi ba ka **inflection** ka paw ha ka rukom kylla dur jong ka kyntien na ka daw ki **affix** hynrei kane ka jingkylla dur ka pynneh pynsah hi kumjuh ia ka ha kajuha ka klas kyntien bad kumta ka **verb** ka sah hi ka **verb** bad ka **noun** ka sah hi ka **noun**. Ka **inflection** ka thew tang ia ka kamram **grammar** jong ki **affix** kum ha kaba pyni ia ka **case**, **number** ne **gender** jong ka **noun** lane ia ka **tense**, **mood** ne **aspect** jong ka **verb**.

Haba phai sha ka ktien Khasi, ngi shem ba ym don kano kano ka jingkylla dur ha ki kyntien ban kdew ia ka **tense**, **mood** ne **aspect** ha ka **verb** lane ban kdew ia ka **number**, **gender** ne **case** ha ka **noun**. Kumta na ka liang ka **morphology** ym lah ban pdiang ba don **inflection** ha ka ktien Khasi.

Ka derivational morphology:

Kane ka bynta jong ka **morphology** ka bishar kumno ki **affix** ki trei kam ban shna kyntien thymmai kiba lah ban sah ha kajuha ka klas kyntien (class-maintaing derivation) lane kiba kylla noh ka klas kyntien jong ki (class-changing derivation). Kine kim don bynta eiei ruh ha ka ban kdew ia ki kamram **grammar** kumba long ha ka **inflectional morphology**.

Mynta ngin peit ia ka jingtrei kam jong ki snap kyntien ba shah teh ha ka ktien Khasi kum ki **derivational morpheme**, kata kum ki snap kyntien **prefix**, ki snap kyntien **infix** bad ki snap kyntien **suffix**.

Ki don ki **affix** kiba pynkylla ia ka klas kyntien, kum u **prefix** 'jing-' uba pynkylla ia ka **verb** sha ka **noun** kumne harum:

Verb

ieit
bam
pang

Noun

jingieit
jingbam
jingpang

Don ki **affix** ki bym pynkylla hynrei kiba pynneh ia ki kyntien ha kajuha ka klas kyntien kum u **prefix** 'pyn-' ba pynsnoh bad ka **verb**:

Verb

rkhie
sngewsih

Verb pynlong (causative verb)

pynrkhie
pynsngewsih

Verb

siew
riam

Verb pynmyntoi (benefactive verb)

pynsiew
pynriam

Wat la u **prefix** 'pyn-' um pynkylla ia ka klas jong kitei ki kyntien kiba iai sah hi ki **verb** hynrei ngi shim ba u dei u **derivational prefix** namar ba ki kyntien ba la buh lang bad u ki long ki kyntien kiba pher na ki kyntien tynrai. Shuh shuh ruh, une u prefix um shym kdew ia ka ka **tense**, **mood** ne **aspect** ha ka **verb** bad kumta ym lah ban shim ba u dei u **inflectional prefix**. Wat la une u prefix 'pyn-' u pynneh ia ka **verb** ha kajuha ka klas kyntien, u pher pat na u **suffix** -ed jong ka ktien English uba pynkylla dur ia ka **verb** ban kdew ia ka **past tense**.

Ka mat kaba khatduh eh kaba pyniapher ia ka **derivation** na ka **inflection** ka long ba ka **derivation** ka kham ai lad ban

pyndonkam ïa ki **affix** ban shna kyntien thymmai katba ha ka **inflection** pat ki **affix** ki dei tang ban pyndep ïa ki kamram **grammar** ba la buh kyrpang na ka bynta jong ki.

Ha ki bynta ba shadien jong kane ka lynnong, yn tai bniah ïa ki **affix** ha ka ktien Khasi kum ki snap kyntien jong ka **derivation**, kata ban bishar ïa ki kum ki **prefix**, ki **infix** bad ki **suffix**.

Ki snap kyntien ba shah teh ha ka ktien Khasi:

Nyngkong eh yn bishar ïa ki snap kyntien **prefix** bad hadien kata yn sa tai sa ïa ki **infix** bad ïa ki **suffix** jong ka ktien Khasi ryngkat bad ki nuksa jong ki.

Ki prefix ha ka ktien Khasi:

Kiba bun eh na ki snap kyntien ba shah teh ha ka ktien Khasi ki dei ki **prefix**. Kumba la kdew haneng, ki don ki **prefix** kiba pynkylla ïa ka klas jong ki kyntien bad ki don pat kiba pynneh pynnsah ïa ka klas jong ki kyntien. Kine harum ki long ki **prefix** kiba kham pyndonkam kynrei ha ka ktien.

1) Ki prefix kiba pynkylla noun ïa ki verb.

a) U **prefix** 'jing-' uba pynkylla ïa ka **verb** sha ka **abstract noun**:

Don ki **verb** kiba kylla **abstract noun** haba don u **prefix** 'jing-' ha khmat jong ki.

<u>Verb</u>	<u>Noun</u>
bha	jingbha
sniew	jingsniew
pang	jingpang
long	jinglong
im	jingim
kmen	jingkmen
kit	jingkit

Don pat kiba kylla sha ki **concrete noun** haba la pynsnoh ïa u **prefix** 'jing-' ha khmat jong ki, kum ha kine ki nuksa harum:

<u>Verb</u>	<u>Noun</u>
bam	jingbam
tep	jingtep
tap	jingtap
thiah	jingthiah
shoh	jingshoh
lehkai	jinglehkai
khang	jingkhang

b) U **prefix** 'nong-' u dei u **prefix** uba pynkylla ïa ki **verb** sha ki **noun** kiba kdew ïa ki briew, kum:

<u>Verb</u>	<u>Noun</u>
pang	nongpang
tuh	nongtuh
hikai	nonghikai
lute	nonglute
trei	nongtrei
bylla	nongbylla

k) U **prefix** 'men-' kum u **prefix** 'nong-' u pynkylla ïa ki **verb** sha ki **noun** kiba kdew ïa ki briew, kum:

<u>Verb</u>	<u>Noun</u>
tuh	mentuh
dih	mendih
suhsyntiew	mensuhsyntiew
shohnoh	menshohnoh
aiksuid	men-aiksuid

(2) U prefix 'pyn-' pat u thaw thymmai ia ka verb sha kata kaba pynlong ne pynleh (causative verb) lane sha kaba pynmyntoi (benefactive verb) bad ka pynneh pynsah ia ka ha kajuh ka klas kyntien. Kine harum ki long ki nuksa:

a)	<u>Verb</u>	<u>Verb</u>
	hab	pynhab
	tuid	pyntuid
	kmen	pynkmen
	shlur	pynshlur
	tieng	pyntieng
	long	pynlong
	iap	pyniap

Ka verb pynlong ka thaw thymmai ia ka kyntien, kum ka verb 'iap' kaba la kylla 'pyniap', kaba mut ban pynlong lane ban long ka daw iano iano ban iap. Harum pat ngi iohi kumno une u prefix u thaw thymmai ia ka verb ban kit jingmut kum kata kaba pynmyntoi (benefactive verb):

b)	<u>Verb</u>	<u>Noun</u>
	ai	pynai
	thied	pynthied
	khem	pynkhem
	tian	pyntian

Ka verb pynmyntoi (benefactive verb) ka pher na ka verb pynlong (causative verb) namar ka kyntien 'pynthied' kam mut ban pynlong ia uta u nongshahleh ban hap thied eiei hynrei ba kiwei kin pynthied eiei na ka bynta jong u. Kumta u long u nongioh myntoi.

Shuwa ban peit ia kiwei de ki prefix, ngi donkam ban sngewthuh ba ar tylli ki prefix ki lah ban ieng lang ha ka kyntien. Ki nuksa ki long kumne harum:

Jingpynlong
 Jingpynshlur
 Jingpynskhem
 Jingpyniap

Ha baroh saw tylli kitei ki nuksa ngi iohi ba ki prefix ki shim ia la ki jong ki jaka, kata u prefix 'jing-' ha khmat duh bad u prefix 'pyn-' pat hajan jong ki kyntien ba pura – 'long', 'shlur', 'skhem' bad 'iap'.

Nalor ki prefix ba la pyni haneng dang don bun shuh kiwei de. Harum yn kdew tang katto katne na ki.

(3) Prefix 'shi-'

shibun
 shiwat
 shisien
 shikti
 shikyntien
 shidap
 shirta
 shispah
 shiktien
 shiphew

(4) Prefix 'mar-'

markti
 markhmat
 marbud
 marwei

marmet
mar-ryngkat
marjan
marsyndait

(5) **Prefix 'myn-'**

Une u **prefix** barobor u kdew ïa ka por ba la leit kum:

mynne
myntan
mynnin/mynhynnin
mynshisngi
mynshem-taiew
mynshem-snem

Kiwei de ki kyntien kiba don ïa une u **prefix** kim kdew tang ïa ka por ba la dep hynrei wat ïa kaba dang ïai jia kum:

mynstep
mynsngi
mynmiet
mynta

(6) **U prefix 'kyn-'**

kyndup
kynthup
kyntur
kynsan

(7) **U prefix 'kyr-'**

kyrsum
kyrshan
kyrduh
kyrshut

kyrsoi
kyrbeit

(8) **U prefix 'byr-'**

byrlieh
byrsiew
byrthiang
bymgut

Nalor kitei dang don shuh shuh sa kiwei ki **prefix** ha ka ktien Khasi kum: 'tyn-' ha ki kyntien 'tynsat', 'tynrah', 'tynjuh'; 'pyr-' ha ki kyntien 'pyrshah', 'pyrshang', 'pyrsad'; 'syn-' ha ki kyntien 'syndah', 'syndam', 'syntuid'; 'jyr-' ha ki kyntien 'jyrwit', 'jyrwat', 'jyrteh', 'jyrsieh' bad kumta ter ter.

Shuwa ban pynkut ïa ka jingbatai halor ki **prefix** donkam ban peit ïa uwei u **morpheme** uba ka jingtrei kam jong u kum u **affix** ka kham pher khyndiat. Une u dei u **morpheme** 'ïa'. Ha kiba bun ki kkep, ngi shem ba une u trei kam kum u **morpheme** ba laitulid, kata kum ka **preposition**. Hynrei don ki kyntien ha kaba une u **morpheme** u trei kam kum u **prefix**, kata ban pynlong ïa ka jait **verb** kaba pynphai markylliang (reciprocal verb) kum ha kine ki kyntien harum:

ïashoh
ïaleh
ïania

Ha kiwei pat ki kyntien u pynpaw ïa ka jinglong **plural** jong ka **subject** kaba ïeng lang bad ka **verb**, kum ha kine ki nuksa harum:

ïabam
ïatrei
ïakren

Peit ia ka nuksa jong ki senten harum ban pynshisha halor kane:

Phi leh aiü? Ka thew ia uwei u lane kawei ka briew

Phi ialeh aiü? Ka thew ia ar ngut lane palat ki briew

U trei shitom - Ka thew tang ia uwei u briew

U iatrei shitom - Ka thew ia ar ngut lane palat ki shynrang briew

Kitei ki nuksa ki pyni ia ki kyntien ha kaba ka **verb** 'leh', 'trei' ka dang lah ban ieng da lade bad ka dang don ka jingmut ba pura.

Ngim dei ban bakla ia kine bad ki kyntien kiba ym lah shuh ban pyniakhlad ia u 'ia' na kiwei pat ki bynta jong ka kyntien. Ha kine ki kyntien u 'ia' u la long syndon ka bynta jong kata ka kyntien bad kum kawei ka kyntien la pynkit ruh tang kawei ka jingmut. Ngi shem ia kita ki kyntien ha ki nuksa ba la pyni harum:

Kum ka **verb** - iaroh, iathuh, ialap, iarap, ialam, iada, iathoh, ialang, iasaid bad kiwei de.

Kum ka **noun** - iarong, kata ka pla Khasi ba thep kwai thep typew ne kino kino ki tiar.

Harum ngin khmih kumno la pyndonkam ia u 'ia' kum u **prefix** ryngkat bad kiwei de ki **prefix** kum 'jing-' 'pyn-' bad 'mar-'.

U 'ia' bunsien u ieng hajan eh jong ka kyntien kyrshan katba kitei kiwei pat ki **prefix** ki ieng kham shakhmat jong u. Peit ia kine ki nuksa harum:

iaieit	jingiaieit	pyniaieit	mar-ia-ieit
iakhlad	jingiakhlad	pyniakhlad	mar-ia-khlad
iasuk	jingiasuk	pyniasuk	mar-ia-suk
iashun	jingiasun	pyniasun	mar-ia-shun

Kumba la kdew shakhmat u **prefix** 'jing-' bad u **prefix** 'pyn-' ki lah ban ia ieng lang baroh ar tylli ha ka kyntien. Shuh shuh kitei ar tylli ki **prefix** ki lah ruh ban ia ieng lang bad u 'ia' kum:

Jingpyniakhlad, jingpyniasuk.

U **prefix** 'jing-' barobor u ieng hi ha khmat eh jong ka kyntien, hynrei u 'ia' hateng hateng u lah ban ia kyliang jaka bad u 'pyn-' kum ha kine ki nuksa harum:

Jingiapyndom, Jingiapyntieng, Jingiapynshit.

Ha kitei ki nuksa ba la pyni haneng, baroh lai tylli ki **morpheme** ba shah teh, kata u 'jing-', u 'pyn-' bad u 'ia-' ki trei kam kum ki **prefix**. Ym lah ban khot ia uno uno na ki da u **infix** namar une pat u dei uwei pat u jait **affix** uba don la ka jong ka snap jinglong kaba pher na u **prefix** lane na u **suffix**.

Ki infix ha ka ktien Khasi:

Ym baroh ki jait ktien ha ka pyrthei ki don ia ki **infix**. Ka la don shibun ka jingsngewthuh bakla halor une u jait **affix**. Kaba donkam eh ban kynmaw ka long ba u **infix** u dei u **morpheme** ba shah teh (bound morpheme), ym u **morpheme** ba laitluid (free morpheme) Kaba ar pat ka long ban kynmaw ba u **infix** u pher na u **prefix** namar une rung hapteng jong ka kyntien, ym ha khmat jong ka. Kumta kumba la kdew shakhmat, u **infix** u long u **morpheme** ba shah teh bad uba la tynsat hapteng jong ka kyntien ban pynlong ia ka kyntien ba thymmai. Ia u **infix** la pyni da u **dash** hakmat bad hadien jong u ban kdew ba u rung hapteng jong ka kyntien. Ka jingshah ialam bakla halor u **infix** ka sdang na ka jingbatai jong ki English kiba la shu pyniahab jubor ban ai nuksa halor jong u wat haba une u jait **affix** um don ha ka ktien jong ki. U **infix** u long uba shem kynrei ha ki jait ktien na ka longiing **Austro-Asiatic**.

Ha ka ktien Khasi ki don ki **infix** kiba pynkylla ia ki klas kyntien bad don pat ki ba pynneh hajuh ia ki. Ngin peit katto katne tylli ki nuksa jong ki **infix** ha ka ktien Khasi. Ngi sngewthuh ba ki dei ki **infix** namar ka don ka jingiajan ha ka jingmut jong ki kyntien baroh ar, kata ha shuwa bad hadien ba la tynsat ia u **infix**. Ngi dei ban pikir bha hangne namar ki don ki kyntien kum 'ler' bad 'lyer' kiba ka jingmut ka pyni shai kdar ba ki dei ki kyntien ba ia pher bad ba u 'y' um dei u **infix**.

Kine harum ki long ki nuksa jong ki infix ha ka ktien Khasi:

1) U infix '-n-' bad '-yn-':

Une u long u infix uba kham shem kynrei ha ka ktien Khasi bad uba la pyndonkam hateng hateng ban pynkylla ia ka klas jong ka kyntien bad hateng hateng pat ban pynneh ha kajuh ka klas ia ki.

a) Ban pynkylla ia ka **verb** sha ka **noun**:

<u>Verb</u>	<u>Noun</u>
shong	shnong
sad	snad
sap	snap
kup	knap
khap	khnap
kdong	kyndong

b) Ban pynkylla na ka **noun** sha ka **verb**:

<u>Noun</u>	<u>Verb</u>
kjat	kynjat
kshaid	kynshait.

k) Ban pynkylla na ka **adverb** sha ka **noun**:

<u>Adverb</u>	<u>Noun</u>
lter	lynter

Kine harum pat ki dei ki nuksa ha kaba une u infix um pynkylla ia ka klas jong ka kyntien, hynrei u pynneh ia ki ha kajuh ka klas kyntien:

<u>Noun</u>	<u>Noun</u>
briew	bynriew
ktien	kyntien
traï	tyndrai
kti	kynti

e) Verb Verb

kdat kyndat

Nalor kitei dang don shuh shuh sa katto katne ki infix ha ka ktien Khasi, kum kine harum:

2) U infix '-p-'

<u>Verb</u>	<u>Noun</u>
ker	kper

3) U infix '-l-'

<u>Verb</u>	<u>Verb/Adverb/Adjective</u>
shur	shlur

Kane ka kyntien 'shlur' ka lah ban trei kam kum ka verb 'u shlur bha ban ia kura'; kum ka adverb 'ka mlien eh ban leh shlur kumne'; kum ka adjective 'u long u ba shlur'.

4) U infix '-yr-'

<u>Verb</u>	<u>Verb</u>
kmen	kymen

Ki suffix ha ka ktien Khasi:

Hangne pat ngin peit ia ki **suffix**, kata ki snap kyntien ba shah teh bad kiba snoh ha ki kyntien kyrshan. Don ki khep ba kine ki **morpheme** ki long kiba la shu khet na ki **morpheme** ba laitluid, kumta lah ruh ban bishar ia ki kum ki **clitic**. Hynrei hangne yn peit bad bishar ia ki kum ki **suffix** kiba bud nadien ki kyntien kyrshan. Ki **suffix** kim da bun kynrei eh kum ki **prefix** ha ka ktien Khasi bad kat ha ka jaka ba ki don, la kdew ia ki da u **dash** nakhmat jong u, kum kumne harum:

1) U **suffix** '-n' u pyni ia ka por ka ban sa wan. Ha ka ktien Khasi ngi shem ba une u **suffix** um snoh ha ka **verb** hynrei

ha ki **pronoun** 'i', 'u', 'ka', 'ki', 'me', 'pha', 'phi' 'nga' bad 'ngi'.
U **morpheme** laitulid uba pyni ia ka por ka ban sa wan u dei
u 'yn' bad u '-n' u dei u **suffix** ba la khet na u. Ki nuksa jong
une u **suffix** ki long kumne harum:

u-n

i-n

ka-n

ki-n

Lah ruh ban shem ia une u **suffix** ba la pyndait lang bad u
complementizer 'ba' ban pynlong ia ka kyntien 'ba-n'.

2) U **suffix** '-m' pat u dei uba la khet na u **morpheme** laitulid
'ym' uba kdew ia ka jingmut ba len ne ba pyrshah (negation).
Une ruh kum u **suffix** '-n' u snoh ha kitei ki **pronoun** ba la
kdew haneng kum:

u-m

i-m

ka-m

ki-m

Une u **suffix** u snoh ruh bad u **morpheme** 'ba' ban long 'bym'
ne 'ba-m' kumjuh ruh bad 'la' ban pynlong ia ka kyntien 'la-
m' ne 'lym'.

Ngi iohi ba kine ki **suffix** '-n' bad '-m' ki snoh barobor eh bad ki
pronoun 'u', 'i', 'ka', 'ki', 'nga', 'ngi', 'phi', 'pha', 'me'. Te kan jia aiu
lada yn pyndonkam baroh ar ha kajuh ka senten? Ngi shem ba u '-
n' barobor un ioh ia ka jaka ba hajan eh bad ki **pronoun** bad u '-m'
pat un hap mih noh da u **morpheme** ba laitulid 'ym', kum ha kine ki
nuksa harum:

U-n ym treh ban leit

Nga-n ym lah ban wan

Ki-n ym shah ia u ban kren.

Kiwei pat ki **suffix** kiba kham donkam ban bishar ha ka ktien
Khasi ki dei kiba pynlong ia ki **deictic** bad ia ki kyntien kylli
(interogative words).

Ki **deictic** ki dei ki kyntien kiba kdew ia ka jinglong shimet
(personal), ia ka jinglong shipor (temporal) lane ia ka jaka (location)
kaba long ha ka por ba u nongkren u kren ia ka. Haba ong ia ka
kyntien 'nga' da u nongkren A ka thew ia u nongkren A hynrei ynda
la kynrup ktien noh da u nongkren B, ka kyntien 'nga' ka thew noh
sha u nongkren B. Kane ka pyni ba ka kyntien 'nga' kam mut tang
ia uwei u nongkren hynrei ka kylla kat kum u nongkren uba dang
kren ia ka. Ha kajuh ka dur ka kyntien 'mynne' ka lah ban mut ia
ka 6 tarik u bnai Jylliew jong u snem 2000 lada kren ha kata ka sngi
hynrei ka lah ban mut ia ka 'mynne' jong ka 8 tarik u Jylliew snem
2000, lada kren ha kata kawei pat ka sngi. Ha kajuh hi ka rukom
'hangne' ka kdew ia ka jaka katba u nongkren u dang don ha kata
ka jaka. Ka kyntien 'hangne' kaba u nongkren u kdew ha ka por ba
u dang don ha iewduh kam lah shuh ban mut ia kajuh ka jaka ynda
u la poi ha Laitumkhrah. Kumta ki **deictic** ki dei ki kyntien ki bym
mut sah kumjuh hynrei kiba kylla kat kum u nongkren, ka jaka
ne ka por ba kren ia ki.

Ka ktien Khasi ka long kaba riewspah ha ka liang ki **deictic** kiba
trei kam kum ki **suffix**. Hrum ngin peit katto katne ki nuksa jong
kine ki jait **suffix** kum: -ne, -to, -tei, -thie, -tai kiba bud nadien ka
preposition 'sha' kaba kdew ia ka jaka:

Shane - hajan u nongkren

Shato - shajan u nongsngap

Shatei - kham sha jngai, ka jaka shalor na u nongkren bad u
nongsngap.

Shathie - kham sha jngai, ka jaka sha tbian na u nongkren bad
u nongsngap.

Shatai - kham sha jngai, ka jaka ba ryngkat ka kynjang na u
nongkren bad u nongsngap.

Nalor kitei dang don ruh sa ki **suffix** -lor, -poh, -neng, -rum kiba long kumne harum:

Shalor - kham halor ka kynjang na ka jaka ba don u nongkren.

Shapoh - kham shapoh ka kynjang na u nongkren.

Shaneng - kham shaneng na ka jaka ba u nongkren u don.

Sharum - kham sharum na ka jaka kaba u nongkren u don.

Lah ruh ban pyndait ia ki bad ka **adverb** 'kum' ha ki kyntien - kumta, kumtai bad kumtei. Lah ruh ban pyndait ia ki bad ka **adverb** 'kat' ha ki kyntien - katto, katne, kattai, katthie, kattei.

Ia kine ki **suffix** lah ban pynsnoh bad ki **pronoun** ha ki kyntien - une, utai, uthie, uto, utei, kane, katai, kathie, kato, katei. ine, itai, ithie, ito, itei. kine, kitai, kithie, kito, kitei.

Ki **suffix** ba kylli jingkylli pat ki long '-ei' bad '-no' bad ki lah ban snoh ha ki **pronoun**, kum - uei, uno, kaei, kano, i-ei, i-no, kiei, kino.

Kine ki lah run ban snoh ha ki **preposition** kum - shaei, naei, haei, iaiei, daei, shano, iano, dano, badno.

Khatduh eh, ngi shem ruh ba don katto katne ki kyntien ia kiba la pynlong tang da ki **morpheme** ba shah teh. Kata kaba mut ar tylli ki **morpheme** ba shah teh ki pynlong lang ia kawei ka kyntien, kata uwei u **prefix** bad uwei u **suffix**. Kine harum ki long ki nuksa jong ki **prefix**:

hang-

nang-

ma-

Kine harum pat ki long ki **suffix**:

-ne

-tai

-to

-thie

-tei

-no

Haba pyndait lang ia kitei ki **prefix** bad **suffix**, ngi iohi ia kine ki kyntien kiba long kumne harum:

hangne

nangtai

hangthie

hangtei

hangno

nangno

nangne

mano.

Wat lada don napdeng ki **linguist** kiba kynthoh ba ka **morphology** ka duna bha ha ka ktien Khasi namar ba kam don **inflection**, pynban kane ka jingbishar halor ki snap kyntien **morpheme** ka pyni shai kdar ba ka ktien Khasi ka long kaba riewspah ha ka liang jong ki snap kyntien ba laitluid bad ki snap kyntien ba shah teh. Khamtam eh, lah ban iohi da kaba shai kumno kine ki **morpheme** ki long ka lad ban shna dur ia ki kyntien kiba don ha ka ktien Khasi.